

O LE SULU SAMOA



EKALESIA FAAPOTO POTOAGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA JANUARI 2023

Email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

MAE'A NISI GALUEGA TETELE A LE EKALESIA



Fale o le Atina'e i Solomona, na fausia e le Eklesia



Fale Faatali Pasi Kolisi Leulumoega Fou, fausia e le Sosaiete
a Matua ma Faiaoga (PTA)

FAASINO UPU

1. O LE LAUGA	2
2. AMATA GALUEGA O LE TAUSAGA	4
3. MAOTA PULEGA APIA I SAUTE	4
4. IA FAI MA FITAFITA FAAMAONI	5
5. IA LOTO TELE PE A LOTO ITIITI	5
6. LAUGA, ASO TUPULAGA 2023	6
7. O LE PEROFETA MULIMULI	8
8. NA O AFIOGA E TULEI MAI	11
9. O I LATOU UA MALILIU	14
10. ATA O I LATOU UA MALILIU	16

O LE LAUGA

Tusi Faitau: F. Tuai - 2 TUPU 3: 6-18
F. Fou - MATAIO 25: 1-3

MATUA: 2 Tupu 3: 16, “*O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.*”

MANATU AUTU: SAUNIA MO FAAMANUIAGAA LE ATUA (*Preparing for God's Blessings*)

O le ola sauniuni, e ese le tāua mo so'o se tagata. Pe e te faigaluega, a'oga, po o le nofo i le fale, e manaomia lava le tapenaina lelei o fuafuaga uma o le aso. O le tāua o le ola tapenapena, e faaitiitia ai o mea e mafai ona sēse ma faalētonu mai, ma e fa'apu'upu'uina ai fo'i o le taimi e alu, pe a sauniuni lelei.

Na manatu lava le autau so'o faatasi anamua a Israelu, Iuta ma Etoma i o latou fitafita savavali ma fitafita ti'eti'e i solofanua, ua lava tapena le latou osofa'iga ia Mese le tupu o Moapi, ona o lona fouvale i le malo o Israelu. A e peita'i ane, e leai. Ua latou tapena faaletino, a e misi atoa le sauniuni faaleagaga. Na ui atu lenei osofa'iga, o autau so'o faatasi i le ala o Etoma, e aga atu ai i Moapi. Na atoa le fitu o aso o faata'amilo le osofa'iga, se'ia o'o ina iloa ane, ua i ai le faalavelave ua tupu.

Ua o'o nei ina uma vai na mafai ona tapena mai. Ua aga'i fo'i ina vaivai autau o fitafita, aemaise fo'i o

solofanua, e faamoemoe i ai le osofa'iga i lo latou malosi. Na o'o le popole ia Iosefatu ma Ioramo, o tupu o Iuta ma Israelu, atoa ma le tupu o Etoma, ona ua tula'i mai lenei faaletonu, o le leai o se vai, o fanua lafulafuā ma le toafa. Na mau manatu lelei Iosefatu, ma na fautuaina ia ave se feau e logo Elisaia le perofeta a le Atua, e uiga i le faafitauli, ina ia fō'ia. Sa faapena ona faia, ma pulunaunauina ai le fesoasoani o le perofeta, se'ia o'o ina maua le tali ma le fofō o le faafitauli, o le leai o ni vai taumafa. Na faapea le upu a Elisaia le perofeta, “*O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.*” O le a le uiga o lea upu a le perofeta? O lona uiga, ia latou galulue ma tapena e talia lelei meaalofa ma manuia o le Atua, e pei ona latou mana'omia le suavai. Ia latou 'eli ni utu, e faaputu i ai le suavai mo i latou ina ne'i maumauina, “*O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.*”

O le manatu ogatotonu o lenei fuaitau ua avea ma matua, o faamanuiaga uma a le Atua mo le tagata, o le a faigata ona ia maua, e aunoa ma lona galue e talia ma fa'aaogā. E ā le Atua e liligi ifo, a e ā le tagata e talia ma fa'aaogāina. E tatou i le tagata, ona nofo sauni ma tapena na te talia le foa'i mai o manuia o le Atua, mo le tagata i so'o se taimi. Ua mafai ona tatou maua mai i lenei tala nisi o sauniuni ma tapenapenaga e mana'omia e le tagata, aiga, nu'u ma le tatou ekalesia i le tatou faigamalaga ua amatalia o le 2023.

O le tu'ufaatasiga o malo tetele e tolu, e ui ina ese'ese i latou, a e ua mafai ona latou loto gatasiasi, ma galulue faatasi mo se faamoemoe lelei ina ia faato'ilaloina le fili, o lo'o lamatia ai lo latou saogalemu. Ua faagalo o latou ese'esega ma ni o latou vaivaiga i le lotoifale, a e tulimata'i faatasi la latou va'ai i le sini e tasi mo lo latou manuia lautele. Sa faapena ona faia e le au so'o o Iesu i le aso penetekoso. Sa latou nonofo faatasi i le mea e tasi ma le loto e tasi. O le tu'ufaatasiga o loto, agaga ma olaga ua faatalitali i le liligiina ifo o le Agaga Pa'ia. O le tapenaga lena e matuā tāua ona maua e le au so'o. A aunoa ma lena sauniuni, po ua faigata ona latou maua le Agaga Paia, “*O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.*”

Le tatou ekalesia, o le lalagaina faatasi o outou soifua ma le tatou ola, o le tu'ufaatasiga o outou finagalo

ma loto, i le mafutaga a le tino o Keriso i le lalolagi, i le loto gatasitasi i mea lelei, i le tatou nofo fealofani faamaoni o le au uso. Aemaise, o le tete' e atu i le leaga ma le agasala. O lo tatou eliina lea ma le saunia lelei o utu, mo le tafe mai o uaga o faamanauia a le Atua i o tatou olaga i lenei tausaga fou, 2023.

Ua le gata i le tu'u faatasiga o ia malo e tolu, a e ua latou talitonu fo'i ma faatuatua i le upu ma le afioga a le Atua. Na iloa e tupu o Israuelu, Iuta ma Etoma e ogaoga le faafitauli, tusa fo'i po o le a lelei o ni au tau, mea tau ma a latou solo fanau, a e a leai se vai, ua le aogā le mea atoa. A e o le faafitauli fo'i, na o le Atua lava e maua ai lona tali. E leai se tagata ola e mafai ona faia se timu ma maua ai se suavai. Ua sa'o la latou mate. Ua fesili i le Atua e ala i le perofeta.

Ua latou talitonu ma faatuatua ina le Atua, o le a maua ai le tali o lenei faafitauli ua latou fesaga'i nei.

Le au pele e, e mana' omia le faatuatua faamaoni ma le talitonu atoatoa, i folafolaga a le Atua e ala ia Iesu Keriso, pe afai tatou te fia maua ana faamanauia. O le to'atele o i latou na faamalolo ina e Iesu i lana galuega i le lalolagi, sa faalagolago lo latou faamalolo ina, i lo latou talitonu ma le fa'atua i le mana faaola o Iesu. O lana saunoaga i le lepela na toe fo'i e faafetai, fai mai, "Ina tula'i ia ina alu, o lou faatuatua ua e malolo ai." ... "**O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.**"

Uso e ia Kersio, i le amataga o le tatou faigamalaga i lenei tausaga fou 2023, ia tatou toa'aga e eli utu o le faatuatua ma le talitonu i le Atua, ina ia tafe mai ai uaga o faamanauia o le alofa tunoa o le Atua. Tatou toa'aga e eli utu o le olaga tatalo ma le mafutaga ma le Atua i le mea lilo, i a tatou tapuaiga faaleaiga, faapea ma le faamalolosi mai i a tatou mafutaga Au leoleo. Ia eli utu o le ola tapua'i i le Atua, i le faamaoni mai i tatou sauniga lotu i Aso Sa ta'itasi. Ia so'oso'o utu le vanu nei. O lona uiga ia tele ni utu e soso'o faatasi, auā o le tele o utu e eliina ma saunia, o le tele foi lena o le suavai e maua mai le Atua.

'Aua e te faatamala e pei o taupou valelea i le fa'ata'oto a Iesu. E le'i i ai so latou manatu o le a tupu se faaletonu i le tuai mai o le faatoa faiavā. Na fiu e tu'itu'i le faitoto'a ina ua tuai mai. Ua latou misia atoa le manua o le fiafia faatasi ma le faatoa faiavā, talu ai ua leai se sauniuniga ma se tapenaga mo lea faamoemoe lelei. O le i'uga leaga o le tagata

faatamala, e tulia i fafo i le mea o i ai le taufai tagi auē ma le lilivau o nifo. O le tatou i'uga fo'i lena, pe a tatou te'ena manuia o le Atua, e ala i lo tatou faatamala e eliina utu mo le faatafe mai o meaalofa ma manuia a le Atua.

O le to'atele fo'i o nisi, ua matele ma mafuli atu i le eli utu e tafe mai ai manuia faaletino, ua o'o ai ina galo ma manatu māmā i measina faaleagaga e sili atu ona tāua. 'Aua e te eli e pei o le eli a le mauoa valea, i le faataoto a Iesu na taumafai e fafaga le agaga i mea o le tino. E lē laulelei lou agaga tusa lava po o le a le lelei o sau taumafataga faaletino. "**O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.**"

Ioe, le au uso e, e le tafe mai manuia o le Atua i lou soifua ma lo'u ola pe a lē eliina utu. Auā, e fesoasoani le Atua i ē muamua fesoasoani ia i latou lava. I le tatou faigamalaga i lenei tausaga fou, po o le a lau galuega, po o lou aiga, po o le a'oga foi, po o le ekalesia ma o tatou tofi, faaletino, faalemafaufau, aemasie le faaleagaga, 'eli ia tele ni utu mo le tafe mai o manuia ma meaalofa a le Atua mo i tatou. Auā, o lē tele ana e lūlū, e tele foi ana e selesele. 'Aua le tatou tete'e i meaalofa ma manuia o le Atua, ona o lo tatou faatamala ma le lē saunia. Ma ia avea fo'i o tatou ola e fai ma utu e tafe atu ai le manuia mo nisi tagata, e ala ia tatou galuega lelei ma uiga alofa uma.

Na eli utu le Atua i le lalolagi e ala ia Iesu Keriso ma lona soifua pa'ia. Na avea o ia utu na so'oso'o utu ai le vanu ta'alaelae o le lalolagi. Na tafe mai ai le vai o le ola ua fa'alanuina ai agasala a le lalolagi. O le vai manino e feinu ai le lalolagi galala i le agasala. O lona tino momomo ma lona toto maligi mai le satauro, ua tafe atu ai le ola ia te oe, a'u, ma i tatou ma le lalolagi. "**O lo'o faapea ona fetalai mai o le Alii, ia outou fai ni utu, ia so'oso'o utu le vanu nei.**"

Le paia ma le mamalu o le Ekalesia, ia SAUNIA TATOU UMA MO FAAMANUIAGA O LE ATUA, ona o le suafa a Iesu Keriso, Amene.

**Saunia: Peletisala Limā (FS)
EFKS FAIRFIELD
PULEGA SINI I MATU
MATAGALUEGA NIUSAUELESE.**

AMATA GALUEGA O LE TAUSAGA 2023

E pei ona masani ai i tausaga taitasi, o le Komiti a le Au Toeaina e amata ai feau faasolo o le tausaga, e ala i le tapenaga o le au tau filifilia o le tausaga mo le Kolisi Faafafeau i Malua. Mo lenei tausaga 2023, ina ua mae'a sauniga lotu e talosia ai le Tausaga Fou ma ona feau, lea sa faatino e Aulotu taitasi mai le Aso Sa 1 Ianuari e oo i le Aso Toonai 7 Ianuari, ona amata loa lea o fonotaga a Komiti. O le Aso Gafua, 9 Ianuari na fai ai le Faatalatalanoaga o A'oa'o sauni mo Malua, e le Laulau a le Komiti Au Toeaina, susuga Asotasi Gu Time FT le Taitafono ma Leaso Tupa'i FT le Failautusi. O le Aso Lua 10 Ianuari na faia ai le Ta'utinoga a A'oa'o, i luma o le Komiti Faatonu a le Komiti Au Toeaina. O le Aso Lulu na sosoo ai o le Fono a le Komiti o Malua, Aso Tofí o le Fono Komiti Faatonu a le Au Toeaina, ma le Aso Faraile o le Fono Komiti Faamisionare.

O le vaiaso na sosoo ai, sa feagai ai nisi komiti ma ana galuega amata o le tausaga. O le Aso Gafua 16 Ianuari - Aso Lulu 18 Ianuari sa fai ai le asiasiga ma le fonotaga a le Komiti Aoga. O le Aso Tofí na fai ai le asiasiga a le Komiti Atina'e, a o le Aso Faraile o lana fonotaga amata o le tausaga. O le faaiuga o le masina sa faia ai le asiasiga a le Komiti Feau Eseese faapea lana fonotaga. O nisi galuega sa faatino ese mai fonotaga a komiti, o le sailia lea o nisi aufaigaluega e ala i Faatalatalanoaga mo avanoa faigaluega, e aofia ai Faiaoga mo Kolisi a le Eklesia, o le au kamuta, palama ma fai eletise i le Ofisa Tutotonu, o le Pule o le Fale Lomitusi, aemaise o le Su'etusi Faalotoifale o se tofiga e tusa ma le faasinoga a le Faave o le Eklesia. O loo ua amata nei le galuega o le fausia o le Maota fou o le Faatonu Aoaoga Kerisiano i Maluafou, faapea le fa'aauauina o galuega i le Kolisi Nuuausala i maota o faiaoga ma falea'oga fou.

Avea foi lenei avanoa e toe faailoa ai sui mamalu o le Komiti Faatonu a le Au Toeaina, mai le nofo a Matagaluega e 21 o le EFKS pei ona i ai nei i le amataga o le tausaga: Taitafono - Asotasi Gu Time FT (Apia Sasa'e), Failautusi - Leaso Tupa'i FT (Faasaleleaga), Tunumoso Soliola Iosua FT (Falealili Safata Siumu), Amuia Seuala FT (Itu o Tane), Ailepata Leuta FT (Aana), Fili Matalavea FT (Malua), Misipalauni Faatau FT (Faleata), Auvaa Peseta FT (Apia), Aila Patea FT (Vaimauga), Pati Vili FT (Lotofaga Lepa Aleipata, sui ia Iosefa Uilelea

FT ua maliu), Pouniu Faamausili FT (Aukilani), Vaaelua Patu FT (Manukau), Faatulituli Setu FT (Laumua o Aotearoa), Faleulu Malaulau FT (Niu Sila Saute), Aviti Etuale FT (Vitoria), Siaki Brown FT (Niusauelese), Simeona Taefu FT (Niusauelese Sisifo), Lance Tautiepa FT (Kuiniselani), Tauaaga Mataafa FT (Kuiniselani Saute), Makerusa Porotesano FT (Amerika, sui ia Andy Leavasa ua maliu), Tinetali Gafa FT (Hawaii). Manuia galuega faasolo o lenei tausaga.

FAAFOU LE MAOTA I MALUA PULEGA APIA I SAUTE

O le malolo ai o le Kolisi Faafafeau Malua i lana tuuaga faai'u o le 2022, na maua ai le avanoa e faatino ai le galuega mo le faafouina o le Maota o le Pulega Apia Saute, i totonusi o le Laumua. Ole maota lenei o le Pulega na ulua'i fausia ina ua toe vaelua le Pulega Apia Sisifo, maua ai le Pulega Apia Sisifo (Apia, Aai Niue, Fugalei, Mulinuu, Alamagoto, ma Falelauniu) ma le Pulega Apia Saute (Leufisa, Tanugamanono, Loimata o Apaula, Vailima, Vaoala ma Falema'i a e le'i tapunia). O le isi Pulega Apia Sasa'e o loo taitaiina e le susuga Moli Moli FT. O le maota o le Pulega i Saute o loo tuaoi ma le maota o le Pulega Sini Tutotonu, Ausetalia, ma sa faataalaelae i le amataga, a o lenei ua fai ona puipui, faatasii ma nisi teuteuga e faalelei atili ai.

O lenei galuega na faatupe mai se Toomaga a le Pulega \$50,000 ma saofaga a Aulotu taitasi, maua ai le seleni na faatino ai le galuega i le tau e tusa ma le \$80,000. O le afioga i le Matuaofaiva, Vainalepa Taogaga, o se tasi lava o Tiakono a le Pulega mai le Aulotu a Loimata o Apaula. E tusa ma le 4 vaiaso sa faia ai lenei galuega, i le taimi o tuuaga a le Kolisi Faafafeau Malua, ina ia tusa ma Iugafono ua faia, ina ia le toe faia se galuega o maota o Pulega, i taimi o loo faagasolo ai le a'oga.

O le falelima i Apia Saute o loo ta'ita'iina e le Toeaina Faatonu Matagaluega Apia, susuga Auvaa Peseta FT & Aiga (EFKS Leufisa), Failautusi susuga Faasalafa Vitaoa FS & Ioana (Vailima), Ioane Petaia FS & Manuia (Vaoala), Poasa Toiaivao FS & Lemina (Tanugamanono), Letupu Matautia FS & Helen (Loimata o Apaula). O le Aso Gafua, 6 Fepuari na tatala aloaia ai le galuega faafou, i le tatalo na saunia e le susuga i le Toeaina. O tapenaga masani lava mo apitaga i le Fono Tele ia Me pe a aulia i le alofa ta'ita'i o le Atua. Malo le galulue.

IA FAI MA FITAFITA FAAMAONI

“⁵E faapea i tatou nei le toatele, ua tino e tasi ia Keriso, ma ua fefafeagaia ‘i itu tino.” Roma 12.

O loo faamatalaina i le Tusi Paia le soifuaga faa Kerisiano i se faatusa po o le gagana o taua: tau, itutaua, faatoilalo, tauivi, manumālō. E faapea foi i auupega, o talitā, pelu, tao, sulugatiti, pulou tau ma le tele o isi. Po o loo e silafia pe leai, a e o loo e auai i se taua faaleagaga, o le taua mo le malo o Keriso; ma e te manaomia le lagolago a isi uso a fitafita, e faaopoopo ma faamalosia atili la tatou itutaua, le itutaua a Keriso. O le taimi na papatisoina ai i tatou ina ia avea ma fanau a le Atua, o le taimi foi lena na amata ai ona ta’ua i tatou o fitafita faaolioli o le malo Keriso. Na oo ina faa Ekalesiaina, o le taimi na aloaia ai ona faapipii le pine ma faafou i ofutau atoatoo. O le faaopoopo mai o isi tofiga pei o le tiakono, a’oa’o, faifeau, faletua, faia’oga Aso Sa, ta’ita’i Autalavou ma isi, o le faaopoopo mai foi lena o tiute faa fitafita tau, ina ia saga faatuputeleina le manumalo o le autau a Keriso.

Se’i tatou manatunatu i le auala o loo valaau, talia ma tapena ai fitafita o le taua i nei ona po, e atunu o loo va tau, ma o loo latou mana’omia pea fitafita e puipuia le saogalemu. Pe afai e te alu atu i le ofisa e fia auai i le ami. Latou te fai atu, ‘Manaia tele, saini mai iinei.’ Ona e fai atu lea, ‘Faatali, e tasi le tuutuuga o lo’u auai i le vaega’au. Ou te lē fia faapipii i se vaega faapitoa, pei o le ami, neivi, maligi. Ou te fia faaopeaopea solo ma fealua ‘i i soo se vaega’au ou te fiafia i ai. Pe afai e vevela le taua i le isi itu, ona ou alu lea i le isi vaega’au. Pe afai foi ou te lē fiafia i le taitaiga a le tasi ta’ita’i, ou te tuua lena vaega a e faapipii atu i se isi vaega.’

Pe mata e te manaomia se ituaiga fitafita faapea, e tau i ou autafa? Ailog! A e o le upu moni, o le ituaiga fitafita lena o loo toatele ai nisi Kerisiano, tagata lotu mulimuli ia Iesu ma lana itutaua. E feaoa’i solo mai le tasi tapuaiga i le isi lotu, ona o le vevela ma le malosi o le taua o loo fai. E fefe ne’i mamulu atu ai lona malosi ma lona saogalemu, e musu ina ne’i maumau ai ona taimi ma mea e pele ia te ia. Peita’i e leai se mea e ta’u o se Kerisiano faaopeopea, o se Kerisiano faavaitaimi; e leai se saolotoga i se Kerisiano e filifili ai pe se a lana mea e fai, a o tau le taua i le malo Keriso.

O le eseesege, o le tumau faamaoni. O le upu Eleni o loo faaSamoaina mai ai le upu ‘mafutaga’, o le *koinonia*, o lona uiga o le tumau faamaoni o le tasi i le isi. Ua fetalai Iesu, *O le mea lea e iloa ai e tagata uma lava o o’u soo outou, pe afai ua outou fealofani.* loa.13. Ma e lē mafai ona e alofa pe afai e te fe’alo’alofa’i solo a e lē matuā tumau faamaoni i le itutaua ua e tautō ai. E lē afaina i latou e o ese ona o le faatamala o le ta’ita’i; fitafita e naunau e fia tau, a e faatausuai ona o vaivaiga o le kapeteni, ona fia siitia lea i se isi vaega’au e lelei ai lana tau. E tatau ma tonu lo latou fesuia’i. A e mo i latou ua masani ma fiafia i le lē faamaoni e amo auupega o le taua, o le faamalosi’au mo i tatou, ia tumau, faamaoni, mafuta ma fesoota’i, ia fai ma fitafita faamaoni a Keriso.

IA LOTO TELE PE A LOTO ITIITI

“O le mea ma lona tausaga...⁴o ona po e tagi ai ma ona po e ataata ai.” Faila.3.

E oo mai le faanoanoa ia i tatou i ona foliga ma lona tino eseese mai. O le faamalolo mai le galuega sa maua ai le totogi e tausi ai le aiga, o le fai mai o le foma’i ua maua i le kanesa po o se isi ma’i ogaoga, o le sola o le toalua a e tia’i ma le fanau. Peitai e leai se tiga e sili ona matuitui nai lo le motusia o le mafutaga mafana ma se tasi e pele i le loto ona o le oti. E fafati mai faagalu i luga o aau, o faanoanoaga ma faavauvauga. O le a lava lau mea e fai, ia ‘aua e te malemo. ‘Aua e te nofoa’i ai iina, ma tuu oe i galu latou te toso ifo oe i lalo. Tau ina tuu lou tino ma le mafaufau e lagona le faanoanoa, a e ‘aua ne’i tuu i ai se avanoa na te milosia ai lou agaga. Ia faataga le mamafa o le avega e fai ma fesoasoani a o e galue i ou mafaufau, o ou popolega ma mea tau faafefe, e oo i ou loimata.

O le faanoanoa na te faaleleia le loto, e pei o le mānava mai i fafo o le kasa kaponi tai okesai, na te faamamāina le tino. Peitai e i ai le faasino taimi e tatau ai ona e tula’i i luga ma aga’i pea i luma. O laasaga taitasi o le faanoanoa e te tau atu i ai, o le te’i, sosoo ma le teena, oo atu i le pakeni, o le tiga, ma taualuga i le taliaina. Fai mai Tavita, “E ui lava ina ou savali i le vanu o le ata o le oti, ou te le fefe lava i se mea leaga; auā o oe ta te faatasi ma a’u, o lau laau ma lou tootoo e faamafanafanaina ai a’u.” Ia malosi pe a vaivai, ia loto tele pe a loto itiiti. **F. Tolua**

LAUGA, ASO O TUPULAGA

Tusi Faitau: F. Tuai: Kenese 33: 1 – 11,
F. Fou: Efeso 2: 13 – 22.

Matua: 33:1 & 5, “*Ua tepe a'e Iakopo ua iloa atu, faauta foi, o Esau...ona tepe a'e lea o Esau, ua iloa atu fafine ma le fanau.*”

Manatu Aoao Vaiaso: **FOFOINA O FEVAEVAEAIGA. 1. FEVAEVAEAIGA ILE FEAGAIGA TUAI**

Manatu Autu Aso Sa (Aso Sa o Tupulaga EFKS):
IAKOPO MA ESAU

O le feavaeaeaiga i le va o Iakopo ma Esau, e tutusa ma le tele o isi va i le Feagaiga Tuai – o feavaeaea'iga na faapogai mai le faasalaga o le gata, lea na fetalai ai le Atua i le faatupu agasala, “¹⁵*Ou te faatupuina le feitaga'i ia te ouluia ma le fafine, o lau fanau foi ma lana fanau.*” Kene.3. O feavaeaeaiga i le va o le lelei ma le leaga, le malamalama ma le pouliuli, le faatuatua ma le faapaupau. O le faamasinoga i Etena, na aumai ai le poloaiga a le Faamasino Sili, o le tiute tauave tuufaasolo ua tuu i le fanau valaaquina a le fafine, ina ia tete'e malosi ma faatoilalo le tiapolo ma ana 'au.

I le lotoifale o Israuelu, ua maitauina ai le eseesega o fanau a le gata, peisea'i ua tauave e le ulumatua, a o fanau filifilia a le fafine e ala mai i le ui'i, po o le lona lua. O loo vaaia i le va o Kaino ma Apelu, Isamaeli ma Isaako, Josefa ma ona uso matutua, ma le fanau a Iese le Peteleema; o ē matutua e auauna ma ifo i le ui'i. I se isi gagana, o le ulumatua ma le muamua peisea'i ua na o se teuteu ala, e saunia ai mo le lona lua, lē mulimuli mai, o le sili ma le autū o ia. Na filifili e Israuelu lo latou tupu muamua o Saulo; na faalēaogāina e le Atua, a e tofi i ai le tupu lona lua o Tavita, ma lona gafa tuufaasolo se'ia tini i le Tupu o tupu. Pe aiseā na faapea ai, o le pule fatialia lena, ma fuafuaga mamana a le Atua, e lē gafataulimaina e le mafaufau o le tagata.

Mo le masaga tama a Repeka, na fesili le fafine pe aiseā ua feu'ua'i ai tama i lona manava; na tali le Atua, “²³*E lua nuu o i totonu ia te oe..e nofo pologa foi le ulumatua i le ui'i.*” Kene.25. O le aso na fananau ai, na muamua Esau, a e mulimuli mai ai Iakopo o loo ia 'u'u le mulivae o Esau. Na tutupu a'e, e tele atu eseesega nai lo mea e tutusa ai e pei o

masaga uma – e eseese leo, pa'u o le tino, e oo i amio, taleni ma agavaa, faiva ma tiute. Atonu e tupu a'e se lagona alofa mo le ulumatua, ona o le faoa o ana measina. Peita'i o lona lava faatalalē i ona tofi, ma lana amio na lūlū i totonu o le aiga, na ia selesele mai ai mala ma puapuagā.

O Iakopo e tuua'ia i lona tau faa'ole'ole, tau faasesē ma fai togafiti poto. Peita'i o le auala lea na faatino ai lona ola magafagafa, moe manatunatu, ola finau mo mea tāua o le olaga; na oo i agelu a le Atua na la finau ma manumalo ai, e ui ina setusetu ai lana savali, a o le setusetu a le talavou ua faamanuiaina e le Atua. O lona natura saili malo, mai lona tua'ā fai miti o Aperaamo.

Ua masani lau faitau Tusi Paia i le tala, na fevaevaea'i ai Iakopo ma Esau. E tusa ma le 20 tausaga na va ai le fogavaa. O tausaga ia na tapena ai Iakopo e le Atua, faalelei atili ana meaalofa ua i ai, suia ia lelei mea o faalētonu. E le'i maumau le feavaeaeaiga, ae na liliu e le Atua taimi o le feitaga'i, ia tupu mai ai ni mea sili – sui lona igoa ia Israuelu, foa'i i ai atalii e faavae ai ituaiga e 12 o le nuu o le Atua.

Ta'oto la le tulaga i fevaevaea'iga i ona aafiaga faanoanoa ma o'oo'oga matuitui. Ae o le a tulituliloa le atu a le sa'ulā, i le sailiga fofō pe na faapefea ona toe maua le leleiga, le toe nofo fealofani, e fefaamagaloa'i, e nonofo filemu le tagata ma lona fili. Ma e manino lava o le Atua le Fofō, o Ia le Foma'i sa taulamua i le togafitiga o le manu'a, le Taulasea sa u'u ma fusifusi ia toe maloloina le gasegase o le toe femisa'i o uso. Auā ina ua tuua e Iakopo o Peresepa a e tiliola i Karana, sa le'i pine ona fa'aali i ai le Atua i Peteli, i le apefa'i ma agelu sa a'ea'e ma ifoifo, ma le folafolaga, “¹⁵*Faauta, ou te i ai ia te oe...ou te toe faafoisia mai oe i le nuu nei; auā ou te lē tuua oe.*” Kene.28.

O le Atua na saunia le aso ma le nofoaga e fai ai le faaleleiga. O le Atua na saunia loto ma agaga, e oloolo pitovaa ma mulumulu'aufoe, e tusa ma lana pule ma lona mana. Na te faa-ma'a'aina loto o nisi, e noanoa matāsele ma tatao mailei, tusitusi lima ma tu'ua'i solo leaga, ia saga faateleina le fe'ino'ino'a'i. A e na te umia foi i ona aao ma pulea loto o nisi, na te faaliu suāvai ma liliuina i se malosi lilo, e lē mafai e se tasi ona teena, ina ia liua fili mata'utia e avea ma paaga e sili ona pēlē ma mamaē. Manatua le fia ma'ema'e o le mapugatama'i o le faresaio mai Taso? Na taia, tauaso, liu suavai le loto ma fesili, “⁶*Le Alii e, se a le mea e te finagalo i ai ou te faia?*” Galu.9.

Fai mai le Poto, “*A fiafia le Alii i ala o le tagata, ona faatupuina lea e Ia o le leleiga ma ia, o e ita ia te ia.*”¹⁶ E lē vale foi le taui o le tagata faatuatua e valaau i le Atua i le aso vale. “*Ua tepa a' e Iakopo...ona tepa a' e lea o Esau.*” O le aso na toe feiloa’i ai Esau ma Iakopo, le taeao nai Penieli, na la’ua tau fai tepa a’e ai i le faamoemoe ua taunu, ua tepa i ‘ula, tepa i le laau o le ola, le toe fonofono masae o le upega, le faamagalo ma le faalelei. E ui ina sau masalosalo Esau, faalotolotolu ne’i tutupu pefea, a e na liua lona loto ma’ā i le sau a Iakopo – e tasi lona faamoemoe, ia faagalo le tuana’i, faamagalo le fili, faalelei ma le Atua, ma ati a’e fanau le aiga ma le nuu mo a taeao, a e a le feau a le Atua. Fai mai a ia, “¹⁰*ua ou iloa atu ou fofoga, e peisea i ua ou iloa atu fofoga o le Atua..*”

Na fetagisi, o Iakopo i le fiafia ua toe talia o ia, o Esau i le faanoanoa ma le masiasi, ua salamō i faufauga leaga o le taui ma sui, faafetai i le Atua ua lavea’iina o ia mai lona faatinoina. Maeu le matagofie o vaaiga i faaleliga, fusifusiga ma feasogiga, o loimata o le fiafia; ta maia kitara, ina olioli tatou nei, i le uso lea ua toe lelei.

Le paia e, o le fofō faigofie lava o fevaevaeiga, o lena o loo i ou aao ma o tatou lima. Ina ua tatou tomua ma taulamua, e fai le ulua’i gaioiga e faalelei. Ina ua faamuamua le isi tagata, e amanaia ona lagona a e lē afaina i tatou. Na femisa’i leoleo manu a Aperaamo ma Lota i fanua. O le a le fofo? Na faamuamua e le tamā matua, ia faamalie le mana’o o le atalii talavou. Sa le’i popole Aperaamo i le gaoā lafulafuā o lana pito fanua, sa le’i afaina po o a aafiaga mulimuli mai, auā sa talitonu i le Atua amiontonu, e faamanuia mai o Ia i ē faatupuina le filemu. O le fofō na faavae i le alofa moni, le alofa na faasatauro ai lona mana’o, a ia fealofani ma nofo lelei tagata uma.

I tuisusiga a le aposetolo o Paulo i Ekalesia, e tofu le Tusi ma le auala e faamatala ai le faaolataga ua faia e le Atua mo le lalolagi agasala, e ala i le maliu ma le toe tu o Iesu. Faataitaiga, o le Tusi ia Roma o loo faalupe ai Iesu o le Atamu lona lua, “¹⁴*Peitai na malo le oti, talu ia Atamu e oo ia Mose, ua oo lava i ē na lē agasala e pei o le solitulafono o Atamu, o le faatusa o ia o lē a maliu mai..*¹⁵*auā afai ua oti le toatele i le agasala a le toatasi, e faasilisili lava i le toatele le alofa tunoa o le Atua, ma le mea e foaihuaina mai i le alofa tunoa, ua i le tagata e toatasi, o Iesu Keriso lea.*”¹⁶

Roma 5.

A o le Tusi ia Efeso, o le gagana o faaleleiga o loo mamanuina ai le Tala Lelei o le faaolataga, ma faalagilagi ai Iesu o Ia o le Leleiga. O Efeso sa tagata ese, sa faapaupau ma ifo i tupua, sa le’i taulia i le feagaiga, sa fai ma fili i le Atua, sa aunoa ma se faamoemoe, aunoa ma le Atua. A ona o Iesu Keriso, lea ua faalatalataina mai ai i latou sa vava mamao. O le toto o Keriso, le vailau e toe faatasia ai le lalolagi sa fevaevaea’i. O Iesu ua na faia ia tasi e sa faalua. O le tagata agasala ma le Atua, ua toe faalelei ma faatasia. O le Iutaia ma le nuu ese ua tasi. O le tagata ma lona tuaoi, ua soloia pa vaeloto o le feitaga’i sa vaeluaina ai. Soo se ituaiga fevaevaea’iga, laititi, feoloolo, lapo’ā, 100XL, ua faaleleia uma i le satauro o Keriso. “¹⁴*Auā o Ia lava o lo tatou leleiga, ua na faia ia tasi e sa faalua, na na soloia foi le pa vaeloto o le feitaga’i sa vaeluaina ai.*”¹⁷

Efeso 2.

Le Ekalesia pele a Iesu Keriso, e tutupu pea fevaevaeiga, mai lava i nai masei laiti, e oo i misa ma taua; i totonu o aiga, faalapotopotoga, le malo ma Aulotu, auā e sa’o le tagata i lona lava ia manatu, e eseese foi faatāua ma faamamafa. Ua tatala feagaiga, tete’ā ulugalii, fefulituaa’i aiga ma nuu mo tausaga e tele. Ua toatele nai o tatou tagata ma aulotu EFKS ua vaeluaina, ma liliu ese i isi ituaiga. Ua faamanatu mai le Tala Lelei, i le fofō o soo se maseiga, ma le auala e manumalo ai le itutaua a Keriso. Ina ua tatou faia e faapei ona savalia muamua e lo tatou Alii, na mata’u, fai mea faalogo ma usita’i i le finagalo o lona Tama. Na le’i faia lona loto, le’i tausisi i sona sa’o, ina ia tatou maua le leleiga ma le filemu moni. Outou tupulaga talavou o le Ekalesia, ia avea outou o ni Esau ma ni Iakopo filifilia e le Atua, mo le faia o lona finagalo i le lalolagi nei. E lē o le Esau naunau’ai i mea faatauvaa o le olaga, e lē fia taui ma sui ma ita faamoemoe. E lē o le Iakopo su’e lona poto ma saili ona manuia i auala faatogafiti, faasoli tulafono. Aua foi le avea ma matua alofa faapito. A ia avea outou ma faatupu leleiga, avea outou ma fofō i le tele o faafitauli o feagai ma tupulaga i nei aso. Ia outou saili malo mo lau Ekalesia pele le EFKS, lou aiga ma lou atunu, lou faasinomaga o loo tu’i atu le mulipapaga i outou faiva. Ina ua moni lo outou talia o Iesu Keriso i totonu o outou loto, ua salamō faamaoni i sesē ma agasala, e ola i se olaga faapa’iaina, usita’i alofa faamaoni, e ola ia Keriso e tusa ma la outou ta’utinoga. Ia manuia le Aso Sa o Tupulaga o lenei tausaga 2023. Ia i le Atua lona viiga e faavavau. Amene.

Saunia: Faitoaga Tolua, Faatonu Sulu.

O LE PEROFETA MULIMULI

(*O le Tala faasolo ua faaSamoaina mai le tusi, ‘The Last Oracle’ tusia e James Rollins*)

“Ua ou mafaia!” na ia valaau atu ai. Na ia oso ifo faapa’ū i autafa o Monike. “Na ou avea lou ofutino mai le falema’i ma togi atu i le vai i le isi vanu.”

“Ma e tia’i i le vai?”

“Itala atu o le faatanoa. Pei ona sa e fai mai ai.”

Na luelue le ulu o Monike. O lona ofutino i le falema’i sa lilofia i le toto ma le afu. Sa gaoia ese mai e se tasi o tamaiti mai lona potu ina ua uma ona sui o ia. O se mafaufauga poto tele. Pe ana fai e tuu ai le ofu, e iloa e tagata na sui o ia.

E le gata i lea, a e na aogā foi e faasesē ai i latou o tulia i latou. Na ia atili faapisia le ofu i le soloi ai o lona afu i le muaulu ma ona ‘ao’ao. Sa faapea foi i tamaiti ma le manukī. O le ofu masae na te tuua se faasino ala manino, o se faasino ala sesē. Sa faamoemoe o lona manogi e ta’ita’i sesēina le ‘au tutuli i le isi itu.

“Tago mai e fesoasoani mai,” na fai atu ai Monike ma ia punou ifo i le ogalaau na latou fa’aaoga e kolosi mai ai i luga o le vai. Na maluelue le la’au i le taumafai a le to’alua, a e sa le’i mafai ona tulei ese. Na faalogoina e Monike le pa’i atu o fulufulu i lona alafau. Na ia liliu ma vaaia Marata o tuu le ogalaau i lona tau’au. Na tasi lava le uuna’i a le manukī, a e taavale le laau i lalo o le vai. E malosi. Na pa’u ifo le laau ma pasasa i le vai, ona toe ea a’e lea i luga ma tafea ese atu. Na vaai atu Monike a o tafea ese. O le tele o metotia eseese e natia ai lo latou auala, o le lelei foi lena.

Na faamalieina Monike, ona ia muamua ese atu lea. Na mulimuli sosoo atu Konesetatino, a o Kisika ma Piota sa tauivi atu. Sa tifatō le auala. Na fesoasoani Monike ma Marata i le au laiti, e ala i le tulei atu o i la’ua i luga. Mulimuli ane ona latou taunu lea i le tumutumu o le a’ega. O luma atu, sa salalau solo ai nisi mauga se tele, o vaomatua ma ni avanoa na o vao. I le itu agavale, e lē mamao ese tele, sa taatia mai ai se avanoa lautele lanu siliva e faailoga ai se vaituloto.

Na laa atu Monike i le itu lena. O se vai faapea e maua i ai tagata, i latou e ono maua mai ai so latou fesoasoani.

Na taofi atu e Konesetatino lona tau’au. “E lē mafai ona tatou o i le itu lena. Na o le oti o loo taatia mai ai.” O le isi ona lima na ia oomi ai le pine o loo faamau i lona fusipa’u, o se faasino kasa.

I nei ituaiga si’osi’omaga lanu lau’ava, na matuā galoa i ia Monike le tulaga lamatia. Na ia filiki a’e i luga lana pine. Na lanu pa’epa’e le laualuga, a e a faasolo a’e i luga le fua o le kasa vevela, ona liua lea i le piniki, sosoo ma le lanu mūmū, faasolo atu i le pāuli toto’i, ma le uliuli. Tai pei o se fua e siaki ai le ma’itō-Na emo ane i lona manatua ni ata pu’e – o se mata ataata lanu moana, o atigilima ninii.

Ona toe mou ese atu lea.

Na oso le tiga o lona ulu. Na tago atu ona tamatamailima i le laina galemulemu o fusiga i tua atu o lona pulou mamoe. Na tepa atu ia te ia Konesetatino i ona mata puiti ma le popole.

O Kisika, lea ua iloa nei e Monike o le tuafafine o Konesetatino, na fusi ona lima i lona manava. “Ua ou fia ai,” na ia musumusu atu ai, peisea’i e fefe ne’i lagona mai, ma iloa lona vaivai.

Na faanenefu atu mata o Konesetatino i le itu sa i ai lona tuafafine, peitai na iloa e Monike ua tatau ona aai i latou mo le faatumauina o le malosi. I le mae’ a ai o la latou solaaga vevesi, na latou manaomia le toe faamaopoopo lelei, e toe iloilo ma fai le tonu pe se ā le isi mea a fai i tua atu o le fe’eli. Na silaloa atu Monike i le vaituloto a o ia lotelote lana pine i ona tamatamailima.

Na o le oti o loo faatali mai i le itu le la.

Na ia manaomia le fia malamalamama atili i lo latou tulaga o i ai.

“O le a tatou saili se nofoaga e malu ma tatou aai faanatinati ai,” o Monike lea.

Na ia savali atu i le isi vanu. O se faasologa o vai laiti na faasolosolo atu i totonu o le laufanua. Na iila le nofoaga i le taseni o afu ma vaega pogjsā. O le ea na sasala i le sau ma le susū. O le vaeluagalemu o le auala i lalo, na iloa atu ai se papa mafolafola o faamalumalu a’e i se vaega na solo. Na ia ta’ita’i atu i ai tamaiti.

Na latou faamautū ma talai a latou ato faafafa. Na fepasia’i luuga porotini ma fagu vai.

Na saili e Monike lana ato. E leai ni auupega, a e na ia maua se faafanua. Na ia fofola i luga o le eleele. O le ulutala sa tusia i le gagana Sirilika. Na faatasi atu i ai Konesetatino, a o ia lamu se fasi sukalati pinati pata. Na maitauina e Monike o laufanua maugā sa faailoga solo i ni tama’i ekisi.

“O maina,” na fai atu ai Konesetatino. “O maina urunaime.” Na faasolo lona lima i le ulutala Sirilika,

ona faaloaloa lea o lona lima ma tusi atu agai i le laufanua. “O Atumauga Urale i Saute. I le itumalo Keliapinisika. Le ogatotonu o fale gaosi auupega tuai. E mata’utia tele.”

Na faasino solo e le tama lona lima i vaega o le faafanua o i ai faailoga o nofoaga mata’utia e lamatia e kasa oona. “E tele maina o loo matala pea, fale gaosi kasa oona ma vailaau faaleitiō, fale pulūtonia. O vailaau niukilia oona ua lafoa’i. Ua tapuni uma, vaganā ni nofoaga e tasi pe lua.” Na ia faasino atu se nofoaga e mamao.

Na tomumu Monike ma le lūlū o lona ulu, a o tilotilo ifo i faailoga o nofoaga lamatia. “A e na pau lava le mea na ou fia iloa, po o fea ua tatou i ai.”

“E matautia tele, ioe,” na lapata’i ane ai Konesetatin. Na faasino lona lima i le itu sa i ai se vaituloto tele, ua lilo atu nei i le vaai. “O le Vai o Karakei. O le vai sa lafoa’i i ai otaota suavai oona, mai le nofoaga atomika tuai o Maiako. E tasi le itula e te tu ai i autafa o le vai a e te oti i le isi vайaso e sosoo ai. E tatau ona tatou taamilo ai.”

Na punou faalatalata atili Konesetatin i le faafanua ma tātā i le ogatotonu o faaputuga maina ma fale o kasa oona. “Na tatou o mai iinei. Le Uaren. O se aai i lalo o le eelele ua leva anamua – Keliapinisika

88 – le nofoaga na nonofo ai le faitau afe ma afe o pagotā na galulue i maina. O se tasi o le tele o nofoaga faapea. Na manatua e Monike maota tetele mo atina’e o alamanuia na ia vaaia i lea nofoaga. E manino mai sa i ai se tasi ua na fa’aaogaina nei nofoaga tuai mo se isi faamoemoe fou.

Na fa’aaau Konesetatin, “E tatau ona tatou taamilo i autafa o le Vai Karakai – a e lē latalata tele.” Na ia tepa atu ia Monike ina ia mautinoa ua malamalama o ia. “O lona uiga e tatau ona tatou kolosia le vaivai o Asanova ina ia tatou taunuū iinei.”

Na tuu e le tama lona lima i se isi nofoaga maina i le itu mamao o le vai.

Sa le’i malamalama Monike. Pe lē o latou saili ea e sosola, ia maua se tagata e fesoasoani ia i latou?

“O le a le mea o loo iina?” na fesili ai Monike, a o ia genogeno atu i le faasino maina.

“E tatau ona tatou taofia i latou.” Na tepa atu Konesetatin ia Piota, o loo faalue ma Marata i se moega o limulimu.

“Taofi ia te ai?” Na manatua e Monike upu a le tamaitiiti ia te ia.

Lavea’i matou. Na faasaga atu Konesetatin i tua ia Monike. “O le mea lena na matou aumaia ai oe iinei.”

11.30 taeao.

Na pupula atu le Ta’ita’i Aoao o Savina Maratovi i le faapotopotoga o tamaiti. Sa i ai i latou i le potu autu o le aoga. Na emoemo manino mai le ata o le Amerika i luga o le televise tele o loo i ona tua.

“E i ai se tasi na ia vaaia le tamaloa lenei o lafilafi solo i le taeao nei? Atonu sa ia ofu i toniga a le falema’i.”

Na faatau pupula atu tamaiti ia te ia mai le faaputuga o laulau laupapa. Na fafagu vave mai i latou mai o latou moega ma potu. E tusa ma le onosefulu tamaiti sa nonofo i vaega, sa faailogaina i lanu o latou ofu. O tua sa nonofo ai i latou ofu papa’e, o i latou sa tauaveina faailoga o kenera a e na itiiti lava taleni na latou faailoa. O le ogatotonu na nonofo ai le au lanu efuefu, e talenia a e lē tulaga ese.

E lē pei o le to’ a sefulu na latou faasoaina nofoa pito i luma.

O i latou nei sa ofuina toniga uliuli. O le vasega Omeka. I latou e toaitiiti na fa’alia taleni maoa’e. Le taleni e sili ona maualuga ma le ofoo fogia, na filifilia e tautuaina le atalii o Savina, o Nikolasi, i taimi faigata e oo mai, ia avea o lana aufono, e faaao ia Savina.

O Nikolasi sa avea ma faasoesā mo Savina, o se faatiga ulu. Na fanau o ia o se ofutino pa’epa’e. O se maumau o le taisi kenera. Na fai e Savina i auala faasainenitisi faafoliga lona ma’itaga, mai se tasi o ulua’i auga tupulaga. Na feagai o ia ma le mageso, ma sa ia totogiina ai le tau e taugatā tele. Na fai lana gaioiga a e latou te le’i malamalama atoatoa i ona kenera. Na i ai tulaga lavelave i le taimi na fanau ai. Mata e lē mafai ona toe maua sana fanau. Peitai na ia ati a’ e se faamoemoe fou mo Nikolasi, se mea o le a aumaia suiga moni ma tumau. Na avea o le galuega o lona olaga atoa ina ua uma ona fanau mai Nikolasi.

Ma sa la’ua vava lalata lava.

Na ia faatau pupula i le laina o ofu uliuli.

Ma nofoa e lua o avanoa i le vaega o le vasega Omeka.

E toatasī le tamaitiiti na nimo anapō.

O Piota.

O lona tuafafine na nimo foi i le taimi lava e tasi, mai se pa manu i Amerika. E le’i maua lava e Savina se tala lata mai i le tulaga ua oo i ai le teine mai ia Iuri. Ua matuā sāō ma gūgū le tamaloa, e oo lava i faailoilo ma feau i fesootaiga faa-uaealesi.

E i ai le mea o loo tupu.

Na ia manaomia ni tali. Na faasolo ina ma’ai ma ma’ati lona leo. “Ma e leai se tasi na ia vaafia Konesetatino, Kisika po o Piota o tuua o latou potu? E leai se tasi!” O isi foi faataupupula silaloa.

O le minoi mai tua o le potu na tosina atu ai lana vaai. O se tamaloa pei se lane na laa mai i totonus o le potu ma genogeno mai ia te ia. O Lutena Porasakova, lana ta’ita’i lagolago. Na la’ei i lana toniga masani lanu efuefu, aofia ai lona pulou mafifia lanu uliuli. Ua ia maua se mea.

Malo!

Na ia liliu atu i faiaoga e toatolu sa tutu i le itu. “Ia taofia lelei i latou i o latou potu. Ia leoleo malu puipuia. Se’ia maua se faaiuga o le mataupu.”

Na ia a’e i sitepu ma ulufafo mai le potu, a o mulimuli atu ai Porasakova. O ona foliga sa tau patupatu ma ma’ila’ila, ma lona umi e gata mai tauau o Savina, o se tulaga sa fiafia i ai le fafine. Na ia fiafia i tamaloloa e pupuu ifo ia te ia. Peitai sa lapo’ a ma masomasoa, ma o nisi taimi e na te maua atu o faatau pupula mai ia te ia ma le mana’ona’o. Na ia fiafia foi i ai.

Na ia mulimuli atu i ona tua a o la’ua laasia le auala e ui atu ai i fafo ma le a’oga. Na taunu loa i fafo, ona maua loa lea o ana tamaloloa e toalua. O le tasi o laua sa i ai lana luko Rusia sa nonoa i lona itu. Na ou ma gū, faafefela i tua laugutu e faailoa mai ai ona nifo maamai. Na toso mau e le leoleo le filifili na nonoa ai, ma ia otegia.

Na ave e Savina se moega lautele mo le manu. O se fefiloi o le luko Rusia ma le luko Siperia, o lona laulauā na toeitiiti oo lona maualuga i le fatafata o Porasakova. O le manu na sau mai le nofoaga o su’esu’ega o manu – o faaigoa o le Menagerie. O iina sa fai ai suesuega i faaopoopoga ma tofotofoina ai le tele o ituaiga faatinoga, e fa’aaoga ai le tele o mamame: taifau, pusi, meatuā’olō, mamoe, manukī. Na avea foi o se nofoaga o manu mo le nuu. Na latou maua i le faasologa o tausaga, sa fesoota’i vāvā lalata tamaiti ma manu, ma o le latou faiā na fesoasoani tele i le faato’afilemuina o i latou faalemafaufau. Ma e atonu o lenei fesootaiga e lē na o le va o faaletagata ma manu, a e faapea foi i le va o amioga fou ma amioga faaopoopo, o se fetufaaiga fefaaasoaa’i o uiga tutusa.

O le luko sa i ai se u’amea o ta’otoga.

O le mea faaopoopo na faapipii i le pito i lalo o le ulupoo o le taifau, faamau i fao sikulū ma faauaea ai. Pe afai e oomi le faamau i le leitiō fesoota’i, latou te mafai ona lagona le tiga po o le fiafia, faateleina le fe’ai po o le filemu, faaosofia le ita po o le sasau.

“O le a se mea ua e maua, Lutena?” na fesili atu ai Savina.

“E lē o i ai tamaiti i le ana,” o le tali atu lea. Na tu o ia ma liliu ane.

“Na matou su’ea atoa le nuu, e oo lava i fale e leai nisi na i ai, a e ina ua matou taamilo mamao atu i tua, na matou maua ai asaga manogi i tala ane o le pa i tua, i tua o le nofoaga o manu. Na tau atu i le auala i luga e sao atu ai i fafo.”

“Na latou o i fafo?”

“Matou te talitonu sa faapena lava, faatasi ma le Amerika mai le falema’i. O asaga o tamaiti e sau mai le falema’i.” O le mea e sili ai, ua tali ai se tasi o fesili. O le Amerika e le’i sola, ona ia ave faamalosi lea o tamaiti. E foliga mai e tuu faafeagai le mea na tupu. E pei sa fesoasoani tamaiti e faasola le Amerika. A e aiseā? O le a se mea sa tāua tele ai le tamaloa? O se fesili sa tu’itu’i pea i le mafaufau o Savina talu ona taunu mai le tamaloa. O le lua masina talu ai, na logoina mai ai vaega’au a Rusia e uiga i se vaa o mala na pu’ea faatagata leaga i le vasa Initonisia. Sa saili solo e vaega’au atamamai o le lalolagi. O Savina na tuu i ai le vaaiga, pe mafai e a latou vaega’au ona sailia ma maua mai. O se su’ega; se su’ega na ia pasi ai. I le muamua, na faasino tonu mai e le au Omega e sefulu lua, le motu tonu sa taofia ai le vaa. Na auina atu i ai se vaatofu o Rusia e su’esu’e, ma na taunu tonu atu i le aloalo a o amata ona goto ifo le vaa.

O se manumalo tele – seia oo ina amata e Sasa ona tusitusi ma le malosi na faasolo ina uma atu ai lona malosi faaopoopo. O ni taseni ata, mai ni vaaiga se tele, o se tamaloa o loo malemo, sa toso i lalo e se upega. Sa talitonu o ia e tāua tele lenei mea, ma atili ai lona fia iloa, na ala ai ona logo vave e Savina le vaatofu Rusia. Ua leva ona i ai tagata maulu i totonus o le sami. Na latou maua se tamaloa, o vaivai tele, sa lavelavea i le upega. Na latou faavave a’e o ia i ofu ‘a’au, tuu faamalosi se mea mānava i lona gutu, ma lavea’i mai o ia i le vaatofu.

Na faatonu e Savina le tamaloa ia aumaia iinei, i lona talitonuga e i ai se mea tāua ia te ia. Peita’i ina ua taunu atu i Keliapinisika 88, na ia ta’utino o ia ua na o se tasi o fai eletise o le vaa. I a latou su’esu’ega, e leai se mea maoa’e i le tamaloa, e lē atamai tele, ua na o se tamaloa ma’osi’osia ma manu’anu’ā, e tautala i se gagana lē manino lelei ma sa mutu le isi ona lima. Sa le’i i ai se mana’o o Sasa ia te ia. Sa faapena foi i ana uo, mai le vasega o le Omeka.

(Sosoo atu Sulu Samoa Fepuari 2023)

NA O AFIOGA E TULEI MAI FOFOGA O LE ALII

IA FAAMAONI

“O le toatele o tagata, e taitasi o i latou ma alagaina lona agalelei; a o ai se na te iloa se tagata faamaoni?”

Faata.20.

Na fesili se tasi alii i lana uo faigaluega, “*O le a le umi talu ona e faigaluega i le kamupanī?*” Na tali atu le uo, “*Talu le aso na lapata ‘ia ai a’u e le pule o le a faate’ a a’u!*” O le upu moni lava, o tagata e ana pisinisi e tigaina tele e su’e ni tagata faigaluega e faamaoni ma faatuatuaina. O tagatanuu e fia maua ni ta’ita’i faalemalu ma le au fai polokiki e faatinino a latou folafolaga pe a tula’i manumalo mai i le palota. I sauniga o le faaipoipoga, e fesiligia ai le alii ma le tamaitai faaipoipo ina ia faamaoni i a la’ua folafolaga ma tautinoga. O le upu moni, a aunoa ma le faamaoni, o le amanaiaina o oe o le a faaitiitia pe matuā soloiesea. Pe a leai se faamaoni, o le aofai o le tuufaatasiga o isi au taleni eseese o le a lē toe taulia, o le a māmāsagia. O le faamaoni na te liua le mea faatauvaa e avea ma vavega, faapea foi ona faaliliuina tagatanuu taito’atasi masani e avea ma tagata faamoemoeina ua ausia matati’ a. Na fesili le tupu atamai ma le poto o Solomona, “*o ai se na te iloa se tagata faamaoni?*” O loo manaomia tele e le lalolagi ni tagata faamaoni. O totonu o le nofoaga o mataaga o Fanua o Papa Samasama (Yellow Stone National Park) i Amerika, o loo i ai e tusa ma le 300 pupū. A e tasi lava le pupū e tulaga ese mai ai. E lē o le pupū aupito telē, o le vai foi e pisi a’ e ai e lē o le maualuga aupito silisili, peita’i o le pupū aupito i ta’uta’ua lea. Ma o lona lauiloa e maua mai i le tulaga e tasi - o lona faatuatuaina tele ma le faamoemoeina. E toatele tagata tafafao ma turisi maimoa mai itu eseese o le lalolagi, e fafia e onosa’i e tutū i le vevela o le la, e matamata ma molimau ai, auā ua i ai le taimi faatulagaina e tutusa lelei lona va, e pupuna ma pipisi a’ e ai le vai vevela e tusa ma le 120 futu le maualuga. O le sa’o ma le faatuatuaina o le taimi e pipisi a’ e ai, i le va e 82 minute, e mafai ai e nisi tagata ona faatonu ma faasa’o a latou uati. O le ala lena na faaigoa ai o Faamaoni Matua (Old Faithful) talu mai le tausaga 1870. E tosina mai tagata ma latou mataina lo tatou faamaoni. E viia ma faaneeneeina le suafa o le Atua i lo tatou faamaoni. O le mea lea, e ui ina tele isi taleni ma amio lelei, a ia ‘aua ne’i manatu māmā ma faatauagavale i lou faamaoni.

“²O lenei, e suesueina i auauna tausi mea ina ia iloa ai le tagata faamaoni.”

I Kori 4.

O le faamaoni e manaomia ai le faatinoina i le selau pasene o lau faatinoga i le selau pasene o lou taimi. Na lomia i le nusipepa Amerika o le Insight se lipoti a le alii pu’eata o Keri Sia na faaulutalaina, *Tauivi mo le Atoatoa...Ina ne’i meaane!* O se lipoti o loo tusia ai ni faamaumauga sa’o a e ofoofogia! O loo tusia ai faapea, pe afai o le 99.9% pasene ua lelei ma ua lava lena, o lona uiga o le isi .1%: e 103,260 pepa lafoga o le a sesē ona faatumu i lena tausaga, 22,000 siaki tupe o le a toesea mai tusi tupe sesē i le isi onosefulu minute, 12 pepe fananau o le a tuuina atu i matua sesē i le aso e tasi, 2 vaalele tulauleele i le aso i le Malae Vaalele Faavaomalo o le O’Hare o le a lamatia le saogalemu, 18,322 meli o le a sesē ona lafo i le isi itulā, 291 taotoga o le fatu i lena tausaga o le a lē sa’o ona faatinoina, 880,000 pepa tala tupe o le a sesē le faatumuina, 20,000 pepa tala vai o le a sesē le tusiga i le isi sefululua masina, ma le 107 taotoga o gasegase ma togafitiga faafomai o le a sesē le faatinoina i le faaiuga o le aso. O ni fuainumera taufaafefe tele ma ni faamaumauga mata’utia lenei, aemaise pe afai o oe le isi tagata e aafia ai!

O le uiga o le mataupu: na o le lelei atoatoa, le 100% e manaomia ma lava lelei i soo se faatinoga. Soo se mea e itiiti ifo nai lo lena e lē lelei, auā e atagia ai lou lē faamaoni ma le lē faatuatuaina o oe. O le mafuaaga lena o loo apoapoi mai ai le afioga a le Atua, “*O lenei, e suesueina i auauna tausi mea ina ia iloa ai le tagata faamaoni.*” O le finagalo o le Atua, o le faamaoni e lē tau o se mafaufauga, po o se manatu pe se fautuaga; a o se mana’oga e tatau ona tino mai i le soifuaga ma le faatinoga o tiute o i latou uma e auauna ia te Ia – ma e aofia ai a’u ma oe

“¹⁰O lē faamaoni i le mea itiiti, e faamaoni foi o ia i mea e tele;

Luka 16.

Na ta’ua e le alii faifeau o Iakopo Meriti faapea, “Na ou fesili i lo’u toalua i le isi aso, pe na ia faaipoipo mai ia te au ona o o’u foliga aulelei? A e na ia tali mai, “E leai, na ou faaipoipo ia te oe ona o lou mafaufa – o mea iti o mea na e taulia!” Atonu pe o se talasua a le faifeau, a o le uiga o lana tala, o mea

e aupito sili ona tāua i le olaga nei, o le faamaoni i mea iti; pe faapefea ona amata totō le faatuatuaina, faapefea ona tupu a'e ma matua ma fua mai. Na tusia e le alii tusitala o Logofelo, ‘E toatele tagata mata e faamanuiaina i mea laiti pe ana lē faalavelaveina i latou i mana'oga tetele.’ O nisi taimi tatou te manatu ifo o i tatou ua tetelē tele mo mea laiti; e sili ia i tatou ona aga'i i luma i fuafuaga ma faamoemoega tetele. Peita'i e ese le silasila a Iesu: “*O lē faamaoni i le mea itiiti, e faamaoni foi o ia i mea e tele; o lē amiolētonu i le mea itiiti, e amiolētonu foi o ia i mea e tele. Afai la tou te le i faamaoni i le oa o le amiolētonu, o ai se na te tuu atu ia te outou le oa moni e tauasi? Afai foi ua outou lē faamaoni i mea a le tagata ese, o ai se na tuu atu ia te outou a outou lava mea?*”

Pe afai e te fia manuia i lau galuega, ia tausisi ma faamaoni i le taimi amata ma le taimi e manava ai; pe afai e te vaaia o i ai se mea e tatau ona fai, ona fai lea, tusa pe lē aofia i le lisi o ou tiute fai. Fai faamaoni le galuega o le aso, e te lagona foi le fafia e selesele mai lona taui; a fai sina mapu ane teisi, e na o le tasi le itulā e te agavaa ai, a e lē o le tolu itula e totogi fua ai oe. Tusi faa-mae'a lelei au lipoti, faamaumau uma mea sa totogi, faafoi sui o faatauga tusa pe na o ni sene, lagolago malosi i fuafuaga e ati a'e ai ma manuia ai le fale faigaluega (Pe afai e i ai se faaletonu e lapelapea ai lau auaunaga i lea itu, e fautuaina lou fa'aali i lumāmea). I se faaupuga faigofie, ia e faamaoni i lau galuega o loo fai, ma soo se feau e tuuina atu ia te oe. “¹⁰*O mea uma ua e iloa e faia e ou lima, ina faia ia i lou malosi...*” Faila.9. O le ituina faamaoni lena e faamamaluina e le Atua.

“²³*e tele lou faamaoni.*” Aue.3.

O le faamaoni na te mafai ona liliu se galuega aupito faatauvaa e avea ma tiute aupito sili ona tāua. Faataitaiga, ia mafaufau i lo tatou faamoemoe e tuu i luga o se mea itiiti lona tino mai pei o le faailoga tusi (postage stamp). E sauni i soo se taimi mo lana auaunaga pe a manaomia. E alu i soo se itu o le lalolagi e auina i ai. Na te faia soo se mea e poloa'i i ai e fia faatino. E pipii pea o ia i lana galuega tofia seja uma lelei ona faataunu. E lē siilima, faafiti pe mā, tusa pe a etoeto taufaalili i ai tagata. Ma e leai se galuega e itiiti pe telē na te lē gafatia. Tatou te le i fananau mai e tutusa uma i tatou; o nisi e tele atu taleni i nisi itu nai lo nisi. Peitai o i tatou uma na

fananau mai, e tutusa le faatuatuaina i le faatinoga o taleni ma agavaa ua foaiina mai i le mea e gata ai le lelei. O le mea aupito sili lea e ao ona tatou faia, ma o le finagalo foi lea o le Atua na foaiina mai a tatou taleni, mo i tatou uma.

E lua selau tausaga talu ai, ina ua faato'ā faavae le Fuāmanua o le Gataifale a Amerika, sa tele se taimi na alu i le sailia o se faaupuga e fai mana moto po o lana mau tauave. Mulimuli ane ona latou malilie autasi lea i le muāgagana faa Latina, *semper fidelis*, o se muāgagana o loo tā mau i loto ma mafaufau o soo se fitafita o le fuāmanua o Setete Tuufaatosi o Amerika. O le ā le uiga o lea mau tauave? O lona faaPeretania, ‘Always Faithful’, a o le ‘Taimi Uma ia Faamaoni’ i la tatou gagana Samoa. E tāua uma upu e lua, a e silisili ona tāua le ulua'i upu – *semper*, (Always, Taimi uma). Aiseā? Auā e lē gafatia e soo se Maligi le faamaoni na o se vaega o lana tautua ma le auaunaga, pe na o taimi o le solo lelei pe talafeagai foi ma ia, pe seiloga e manao ai, ma avea o se auala e faafiafiaina ai o ia. O le *Semper Fidelis* o lona uiga e tatau ona e faamaoni i taimi uma – tusa lava po o le ā lona taugatā ma ona tuatuagia ma ou a'afiaga. E finagalo le Atua ina ia faia ia te oe le faamālō o loo fai ia te Ia: “*Ua tele lou faamaoni.*” O le mea lea, pe o oe o le pule o le galuega, po o se tagata faigaluega, o se tamā, tinā, tane pe se avā, se uo, se paaga, se seila, maligi, faifeau, a'oa'o, tiakono pe tagata lotu, o le afioga a le Atua mo i tatou uma – la faamaoni i taimi uma!

MALAMALAMA I TOTONU O LE POGISA

“⁴⁸*Ua silafia e ia i latou ua tigaina e taualo, auā ua agi mai luma le matagi; ona maliu atu lea o ia ia te i latou i le leoleoga e fa o le po, ua savali i luga o le vai, o le a maliu loa.*” ⁴⁹*A o i latou ua iloa o ia ua savali i luga o le vai, fa i latou se aitu; ona latou uiō ai lea.* ⁵⁰*Auā ua iloa o ia e i latou uma, ua atuatuvale ai. Ona fetalai atu loa lea o ia ia te i latou, ua faapea atu, “Ia outou loto tetele; o a'u lenei, aua tou te matata'u.”*

⁵¹*Ona maliu a'e lea o ia i luga o le vaa ia te i latou, ona malū ai lea o le matagi; ona matuā segia ai lea o latou mauli, ua latou ofo ai.”*

Mare.6

E i ai nisi taimi e fa'aaogā ai e le Atua taimi o le pogisā e fai ma meafaigaluega e a'oa'oina ai i tatou. E faasolo ina e iloa manino le Alii ina ua e soifua i totonu o afā faatasi ma Ia, ina ua e taunu i le nofoaga

e te faapea ane ai, ‘Afai e le afio mai le Atua mo a’u, o lona uiga o le a ou goto ifo. Ona afio mai lea o Ia, ‘ua savali i luga o le vai’.

Na fetalai Iesu i ona soo, “²⁷O la ’u e fai atu ia te outou i le pouliuli, tou te ta’u atu lea i le malamalama.” Mata.¹⁰ O totonu o ou itula aupito pogisa, e tuuina atu ai e le Atua nisi o ou malamalamaaga aupito sili ona manino. O la le Faisalamo, “¹²Auā o le pouliuli e le pouliuli lava lea ia te oe; e malamalama le po pei o le ao; e tusa lava ia te oe le pouliuli ma le malamalama.” Sala.¹³⁹ O le mea lea ia ‘aua le sola ese mai ou faafitauli, a e fesili i le Atua ina ia “³fogi atu ia te oe oloa o loo i le pogisa, ma oloa lilo o loo i mea nanā.” Isa.⁴⁵

Pe afai o le pogisa o loo e soifua ai nei, ua faapaiaina e le Atua, ona ‘aua lea e te taumafai e fai sou oe lava malamalama. “¹⁰O ai ea so outou ua mata ’u i le Alii, o loo faalogo i le upu a lana auauna, o lē savali i le pouliuli, a e leai sona malamalama? Ia faatuatua o ia i le suafa o le Alii, ma faalagolago i lona Atua. ¹¹Faauta mai outou uma o e si’ a se afi; ua siomia outou e outou i aloiafi; saviali ia i le malamalama o lo outou afi, ma aloiafi o lo outou afi; e oo ia te outou lenei mea ai lo ’u lima, tou te taooto i le tiga.” Isa.⁵⁰ Afai e te ola i le pogisa ona o le finagalo o le Atua, e leai se mea e te popole pe fefe ai; ua folafola mai e le Atua na te laveai ma faaola ia te oe.

IA FA’AALOALO

“¹⁵Ia saunia pea lava outou e tali atu ma le agamalu ma le ava ia i latou uma o e fesili mai ia te outou i le uiga o le faamoemoe o loo ia te outou.” 1 Pete.3.

E lua auala e mafai ona aumai ai i fafo le lega o le fuamo; o le tasi auala o le tata’ e o le fuamo, a o le isi auala, o le tuu i se nofoaga mafanafana ma se siosiomaga lelei, ona onosa’ i lea se’ia tatama ma oo ina fofoa mai ai le tama’i moa. O le tasi auala e mate ai, a o le isi e faasaoina ma ola ai. E faapena foi ona lua auala e momoli atu ai le Tala Lelei i tagata; o le tasi auala o le sasa ma tu’itu’i faa-samala i le ulu, mafaufau ma loto o tagata, a o le isi auala o le alofagia o i latou ma aumai i totonu o le aiga o le Atua. O le a le metotia o loo e fa’aaogaina e momoli atu ai le Tala Lelei i le fanau a le Atua? Na o se fesili faatupu manatu, o lo tatou sa e fau tele, fai atu ai foi.

TUPUOLA FAALEAGAGA

“¹⁵Ia tutupu i tatou ia te ia i mea uma..” Efe.4.

O le tupuola faaleagaga e lē o se mea e faa-otometi. E tatau ona ia te oe le naunau ia tupu ma ola, ia e filifili e tupu a’ e ma ola, ia faatonutonu ma a’oa’oina lelei lau amio ma au tapenaga, ma ia e fiafia i le tuputupu a’ e faaleagaga. Atonu e te faapea ane, ‘O lo’u olaga e fai sina faigatā.’ Ia e silafia, e toatele nisi tagata e sili atu ona leaga le tulaga sa i ai, a ua latou tutupu a’ e seia oo ina matutua faaleagaga. E toatele foi nisi e lelei atu le tulaga sa i ai, a e ua tutumau ai pe a i le tamaitiiti faaleagaga. E mafua ona sa latou faalotolotolu, sa masalosalo i lo latou agavaa e gafatia ai le tupu a’ e ma ola, ona latou faatāfea solo ai lava lea i le itu e tafe i ai le au. O nisi ua faatuai ma ua toe tolopō atu lo latou tutupu a’ e, i le manatu faapea ane, ‘O le a ou faasaga atu i ai pe a sui le tau ma sologa lelei aso’. Peita’i e lē tupu lea mea. O le tupu a’ e ma ola e amata i le filifiliga fai. “⁹Ua faapea atu (Iesu) ia te ia, ‘Ina mulimuli mai ia te a’u.’ Ona tulai ai lea o ia, ua mulimuli atu ia te ia.” Mata.⁹ Sa le’i malamalama atoatoa lelei Mataio i tuatuagia o lana filifiliga na fai; pau lava lea, ua filifili e mulimuli ia Iesu. Ona pau lava lena o le mea manaomia, e amata ai lou tupu a’ e ma ola lauusiusi faaleagaga: o sau filifiliga. E leai ni mea e sili ona aogā i le faatonutonuina o lou olaga, nai lo filifiliga e te faia. Pe afai e te fia iloa le tulaga e te oo i ai i le isi tolusefulu tausaga o lumana’i, ia iloilo au faamuamua ma ta’utinoga o loo pulea lou olaga.

O iina i le tulaga o faatinoga o mea e faamuamua, e tele ina tatou misia ai mea silisili mai le Atua. Auā ua tatou fefefe e ta’utino ma faatino le faamuamua o se mea patino, a ua fai na o folafolaga ma ta’utinoga faa’-afa’afa i le tele o mea, ma i’u ane ai ua fememea’i ona o le sesē o mea sa tatou filifili i ai. A e afai tatou te faamamafa ma faamuamua mea sesē, tatou te i’u ina ola faanoanoa ua salamō i le vale tuulima o filifiliga. O filifiliga uma e i ai ona tuatuagia, o le mea lea ia poto ma atamai lau filifiliga e fai nei. O le soifuaga faa-Keriso, e maua mai ina ua fai filifiliga faa-Keriso, ona faalagolago lea ia te Ia na te faataunuina nei filifiliga uma. Ma o le upu moni, o Ia na te “²⁴faa’o’ofu outou i le tagata fou ua faia e foliga i le Atua, i le amiontonu ma le amio lelei e faamaoni.” Efe.4.

OILATOU UA MALILIU

LEAPAI TAUSILINUU PASIKA

28/12/1945 - 21/10/2022 (76+9+24)

O le afioga i le Tiakono EFKS Laulii, Matagaluega Vaimauga. Na soifua mai le tamā i le Aso Faraile 28/12/1945 a e na valaau le Atua ma faamānava ana feau i le Aso Faraile 21/10/2022, ma ua 76 ai tausaga, 9 masina ma le 24 aso o lona soifua. O ona toe sauniga sa fai i le malumalu o le EFKS i Laulii, o le ekalesia sa soifua a'e ai, ma tautua ma galue ai seja oo ina valaau mai lona Matai.

O le molimau a le fanau ma aiga, o se tamā sa tamaoaiga i le tele o meaalofa a le Atua, i taleni e tele sa tautua ai i lona nuu ma lona aiga ma lana ekalesia, e pei la o taaloga ia o le Voli (Volleyball) Kirikiti Faasamo, ma le Faipelē (Boxing). Sa ia faasoa i lana fanau ma lenei nuu ma avea ai nisi ma avefu'a o le atunu i ia lava taaloga. O se tamā loto maulalo ma loto alofa, sa fa'aalia lava lea i le tausiga o lona aiga, ma lana faamuamua i ona uso ma tuafafine.

O loo maua foi i api o le galuega, na papatisoina o ia i le aso 6 Oketopa 1946, faaipoipo i le aso 20 Aperila 1977, ma au saili ma faafolia ai i le ekalesia i lea lava tausaga. A e o le aso 20 Me 1980 na avea ai i laua ma le tina ia Vaimoana ma Tiakono i le ekalesia. E 42 tausaga o tautua i le ekalesia i le tofi o le Tiakono ma o le Tiakono mulimuli lea mai le vaitau o le Tamā Faifeau ia Esera, ma o lea ua 3 ia i maua faifeau o tautua i ai le tamā ia Leapai Pasika. Sa faa autū le feau faamafanafana ma le molimau i lea aso i le Tusi o Iakopo 4:13-15, i le autu e faapea: *Fa'aaogā tatau le taimi ma faatāua le ola.* Amuia lea tamā, auā e maua mai e lona matai o loo faapea lava ona ia fai. O au lava foi na taitai i ona toe sauniga i le tuugamau ma o matou faatofa atu ai i le pese faatofa a le au-Kerisiano. Ia manuia lau malaga, lau afioga le alii tiakono Leapai Tausilinuu Pasika.

*Saunia: Pita Toleafoa FS,
EFKS Laulii
Matagaluega VAIMAUGA*

MATAMATAGI SOOTAGA KELEMETE

7/11/1938 - 12/11/2022 (84+0+6)

O le tina matua o le EFKS Laulii, Matagaluega Vaimauga, na soifua mai le Aso Gafua 7/11/1938 a e na valaau le Atua ma faamanava feau a lenei tina i le Aso Toonai 12/11/2022 ina ua 84 tausaga ma le 6 aso o le soifua. O ona toe sauniga sa faia lava i le malumalu o le EFKS Laulii, o le ekalesia na soifua a'e ai ma tautua ai i tausaga o le malosi i le aso 25/11/2022.

O molimau a le fanau ma aiga o se tina loto alofa, agamalū ma loto maulalo, e lē se tagata foi e lagona soo sona leo, a e o se tagata sa tele meaalofa a le Atua sa ia maua na mafai ai ona maua le ola e le tele o nisi fanau e sulufai mai i ai e fofō i ma'i sa feagai ma latou. O se tina foi sa fai ma vaaiga i le itupā o tamaitai i le mafutaga o tina i lenei ekalesia, sa taulamua lava faatasi ma isi tina matutua i le faamaopopoina o lea itupā aemaise o a latou faiga meaalofa mo le au matutua ma le au faigaluega a le nuu nei ma faapea lava foi mo le nofoaga i Mapuifagalele.

O loo faamauina lava i api o le galuega, na ausaili ma faafolia ai i le ekalesia i le tausaga e 1957, na faaipoipo i le aso 25/04/1964, a e na fai i laua ma Tiakono i le ekalesia i le aso 25/03/1990, ma galulue ai lava seja oo ina valaau le Alii ma faamanava feau a le tamā o le aiga i le tausaga e 2016, ona galue toatasi mai ai lava lea o le tina. O ia foi sa fai ma faiaoga Aso Sa seja oo lava ina ua lē gafatia e le malosi le galuega ona ia faamavae mai lea ma tapuia faiva o le au galulue i lona aiga, le nuu ma le aulotu. Sa fa'aautū lava le molimau ma le feau faamafanafana o lea aso i le taiala o le Au Leoleo, "*O i tatou o molimau ma auauna filifilia a le Atua.*" O a'u lava foi na ta'ita'i i ona toe sauniga i lona tuugamau ma matou faatofa atu ai i le pese faatofa a le Au Kerisiano. Tofa Tina. Ia manuia lau malaga.

*Saunia: Pita Toleafoa FS
EFKS Laulii,
Matagaluega VAIMAUGA*

TAPUONO TALIMALIE

25/12/1943 – 22/12/2022 (78+11+28)

O le tina matua o le EFKS Laulii, na soifua mai i le Aso Kerisimasi, Aso Toonai 25/12/1943 a e na valaaau mai le Atua ma tuua ai le ola nei i le Aso Tof 22/12/2022, ae toe o ni nai aso atoa le 79 tausaga o le soifua (78 tausaga, 11 masina, 28 aso). O ona toe sauniga sa faia lava i le malumalu o lana ekalesia na soifua a'e ai, ma tautua ai seja i'u le soifua, EFKS Laulii i le aso 16/01/2023.

E faagaloga lava le mafutaga i le aiga i ona tuagane ma lona uso e toatasi ua tuua a e maise o le fanau ona o se tina loto maulalo ma loto alofa , o se tina foi e onosai ma faapalepale. Auā po o a lava vesiga o le aiga o ia lava e tu i le foe e faatoofilemu mea uma. Sa tamaoaiga lava foi i faamanuiaga a le Atua ma faaaaogaina ai ia mea alofa e ala i le tausia ma le apelepeleina o fanau, ma fai ai lava foi ma faiaoga Aso Sa i le tele o tausaga ua mavae. O se tina sa fiafia lava ia i lana tautua ma le auaunaga i le Atua, auā e tiga lava ona faigata le fealuai ona o le tulaga faigata i ona aao, a e sa faatino lava lana galuega faa faiaoga Aso Sa ma lana pito laau i le mafutaga a tina i le malosi na maua.

E i ai se tasi o le fanau e i ai le taleni o le folaina o le maa (tile) i totonus o pale, a e nofo i Amerika Samoa. Sa manaomia e le ekalesia i galuega tetele ua maea atu ma sau ai, o le a lava le meaalofa e ofoina e le ekalesia, e lē taua lea i le tina, a e mitamita lava o ia ona o le fanau ua aogā i le galuega, e viia ai le Alii. Sa fa'aautū lava le molimau ma le feau faamafanafana i lea aso i le manatu taitai o le tusi o le Au-Taumafai, “*Aga'i i luma i le faatuatua.*”

O a'u lava foi na ta'ita'i i ona toe sauniga i le tuugamau ma matou faatofa atu ai i le tina i le pese faatofa a le Au-Kerisiano. Tofa tina, ia manuia lau malaga i lo tatou nuu moni i le Lagi.

*Saunia: Susuga Pita Toleafoa FS
EFKS Laulii,
Matagaluega VAIMAUGA*

DELTA TOGITOTO T. NGLAM

25/4/1986 – 10/8/2021 (35+3+17)

O Delta o se alo e faasino ia Fueloa Tavita ma Leveti, o se tagata lotu o lenei Ekalesia, o ia foi o se sui o le mafutaga a tina. O se sui foi o le aufaipese. O se tamaitai sa matauina lona fiafia i mea Faa le Agaga, Aoga Aso Sa, Autalavou ma le Aufaipese sa fiafia lava e auauna ma faaaaogaina ai lana taleni. Ua oo ina avea ma tagata matua ma ua atia'e lona aiga, sa auai atu loa ma galue i le mafutaga a tina. E faamaopoopo i mea uma e ui lava ina tuatuagia i lana galuega, a e le mafai ona tuua lona valaauiina. E le tele se taimi e oo mai ai i lona aiga ona o lana galuega. A e o lona agaga fia galue, sa fiafia ai foi e faataunu ona tiute pe a valaauiina i soo se sauniga a le mafutaga a tina. Ma e valaaau le Atua ia Delta ua uma ona lauga, ua tatalo foi ma auai i le tele o faamoemoe o le mafutaga a tina ma le aulotu e faataunuina. O se Tamaitai e lima foai i soo se taimi e fetauai ai i le taulaga i Apia

Sa tautua i le malo e ala i le Matagaluega o Leoleo, ae sa i ai foi lona faanaunautaiga ina ia auai atu i galuega faavaitiaimi e pei ona ua leva ona tapena i ai ao lei valaaau i ai le Atua. Ae sa matauina lona fiafia ma lona faamaoni i lana galuega sa auauna ai ma tautua i le malo. O Delta sa fai ma lima taumatau o nai ona matua i le tausiga o le aiga aemaise o le fesoasoani i le tautuaina o le Atua e ala i le Ekalesia. E ui foi ina ausage le aiga a e sa le faavaivai lana lagolago i ona matua i soo se mea. O se tamaitai ua tele lona aoga i le aiga aemaise foi o le galuega a le Atua. Peitai e le faitau masina lava le tagata ma le finagalo o le Atua. E valaaau foi le Atua i le tagata a ua uma lava ona ia tapena isi laasaga mo i tatou o loo faaaauau pea le folauga. O se faalavelave tau taavale na aafia ai o ia, ua aveesea faafuasei ai, ona o le tuga o ona manu'aga. Ua faitauina ana galuega ma lona sao i le faamaopoopoina o le tala lelei, ma e ui lava i le tele o fuafuaga sa aga i ai le tagata, aemaise foi o le tele o tuatuagia ma faamoemoega sa feagai ma Delta aua lana sailiga ina ia manuia aiga, a e sa ogatotonu lava i le Atua. Sa fa'alatalata i le Atua o LE sa manuia ma lelei ai ana taumafaiga. “*O a'u nei ou te fa'alatalata atu i le Atua ou te lelei ai, Ua ou faia le Alii lo'u Atua ma o'u malu, ina ia ou ta'uina atu o au galuega uma.*” Salamo 73 : 28 Manuia tele le malaga Delta.

Saunia: Susuga Pati Vili FT,

*EFKS Saleaaumua
MTG LOTOFAGA LEPA ALEIPATA*

ATA O I LATOU UA MALILIU

DELTA TOGITOTO
TAVITA NG LAM



TAPUONO TALIMALIE



LEAPAI TAUSILINUU PASIKA TK



MATAMATAGI SOOTAGA
KELEMETE

